

Ministerio di Cultura ta aplaudi plan y vision cu tin p'e renobacion di Rancho

DEN cuadro di e proyecto 'Postzegel Rancho', Minister di Cultura Otmar Oduber ta mira e balor agrega cu e proyecto aki tin pa turismo di Aruba.

Sra. Anna Witseburg, Directora di Fundacion Monumento Aruba a presenta e vision di proyecto Rancho y su herencia cultural na Minister Oduber.

Ta trata aki di e proyecto 'Postzegel Rancho' cu ta un proyecto cu lo ilustra un stampia di loke Rancho ta representa.

E area cu ta cay bou di e proyecto Rancho lo cuminsa na lama te cu Boliviastraat, cu ta un pida cu ta coy solamente Ranchostraat, Visstraat, John G. Emanstraat y Emmastraat cu t'e blok di Rancho cu hopi historia.

Mirando cu Rancho ta un di e barionan

mas bieu di Aruba, rico na monumento y cu hopi herencia no tangibel manera ritualnan tradicional, e proyecto Stampia Rancho lo honra e historia cu ta existi den e bario aki.

Sr. Clifford Rosa, Presidente Fundacion Rancho a duna un splicacion amplio di e trabounan cu nan a bin ta haciendo e ultimo dos añanan hunto cu Fundacion Monumento Aruba, unda a papia di e plan, e visionnan, loke tin cla caba y kico ta loke falta pa cuminsa.

Tambe pa sigui wak e cooperacion entre ambos fundacion y Gobierno.

Fundacion Monumento Aruba hunto cu Stichting Rancho kier a mostra e mandatarior por medio di e presentacion aki e importancia pa preserva e herencia cultural cu e blok di un bario manera

Rancho tin.

Ambos fundacion ta indica cu lo keda enfoca riba e herencia y historia y cu e proyecto aki lo concentra pa haci di e desaroyo aki un experiencia hopi positivo p'e bario, sra. Witseburg ta bisa. E intencion di Stampia Rancho ta pa concentra riba e potencial di e bario aki, cu t'asina serca di Oranjestad cu t'asina bunita renoba y lo kier haci proyecto Rancho un expansion di centro di ciudad y un atraccion turistico mas p'e bishitante.

Rancho tin hopi pa ofrece tanto na turistanan y tambe na esnan bibando aki na Aruba.

Sra. Wittseburg a splica cu hunto cu Fundacion Rancho y 20 otro stakeholders for di diferente otro

sector, tin tur plan cla pa inicia cu e ehecucion di e plannan di desaroyo pa e proyecto aki lo ta sigur un otro landmark den centro di ciudad.

E proyecto aki lo combina e aspecto cultural y turistico cu otro cu ta sigur importante pa Aruba.

Pa Minister di Turismo y Cultura, Otmar Oduber, e proyecto aki lo cuadra exactamente cu e demanda, unda cu e tendencia cu tin awendia ta mostra cu e interes di e bishitante moderno ta uno hopi interesa den e historia y herencia cultural di e isla banda di e aspecto di lama y santo blanco.

Mas aun mirando e ruta di e tram saliendo for di e Cruise Terminal, unda e unico cu bo ta encontra na caminda ta un serie di monumento, yena cu historia y cultura.